

# LA PUNT



## raspada da Zernez

cun las fracziuns Brail, Lavin, Susch e Zernez

gün fin avuost 2024

### Vita ligera da stà



A la fin esa darcheu stà. Il temp chi'd es chod dadoura es predestinà per ir oura e giodair temp liber, per inscuntrar vaschins ed amis e per sezzar insembel e giodair cumünanza. Id es ün temp da ligerezza, plaschair bliers e bels inscuters e per festagiar la cumpagnia. I das-ch'esser ün temp cun ligerezza eir per nossa cumünanza cristiana. Sco raspada daja

quista stà occasiuns d'inscunter, passantar temp insembel e festagiar insembel bels cults divins. Sül program da quista stà vaina cults divins cun battaisems. Id es adüna bel da verer chi dà ün avegnir per nossa cumünanza e cha giuvens genituors as deciden da dar inavant il fö a la prosma generaziun.

Nus festagiain da cumpagnia eir ün cult divin da Tasé per far ün'esperienza spirituala in nossa cumünanza, ün'esperienza per ir ün pa plü chafuol in tschercha da cretta. Eir quista stà daja üna festa per grond e pitschen sü Gonda illa ruina da la veglia baselgina, ün cult divin da famiglia e d'inscunter. Dimena ün iscunter per l'intera raspada eir amo culs vaschins da la raspada d'Ardez-Ftan-Guarda. Ün'occasiun per giodair üna cumünanza in ün ravuogl plü larg suroura las generaziuns e suroura als cunfins da nossa raspada.

Adonta da tuot la ligerezza da la stà, saraja greiv dad invlidar cha nus vivain in ün temp, il qual sül muond daja mincha di novitats da guerra e sgrischur. Dess quai esser üna sumbriva chi ans lascha resegnar, esser trists e dar sü? Nos Segner Gesu ans ha preparats güst per temps similis. El ans ha muossà a tegner insembel, ad avair ed a cultivar cumünanza ed ans dar tegn tanter pêr, e surtuot ad avair spranza e fiduzcha in Dieu. Grazcha a la fiduzcha cha nos Segner Gesu Crist ans ha impromiss tras la cretta, pudain laschar ils pissers da quist muond ed avair curaschi per la ligerezza ed il plachair da la stà.

# Cults divins da gün fin avuost 2024

Data	Brail	Zernez	Susch	Lavin	divers
<b>gün 2024</b>					
02 – 06	-	11:00 r Jon Janett	09:45 r Jon Janett	-	Vacanzas da duonna ravarenda dr. Rebecca Giselbrecht
09 – 06	-	-	-	11:00 r Jon Janett	
16 – 06	-	11:00 d/r R. Giselbrecht	-	09:45 d/r R. Giselbrecht	Cun battaisem a Zernez
23 – 06	-	09:45 d/r R. Giselbrecht	11:00 d/r R. Giselbrecht	-	
30 – 06	Ingün cult divin in nossa raspada – cult divin da la Sinoda a Zuoz				
<b>lügl 2024</b>					
07 – 07	-	-	-	11:00 d/r R. Giselbrecht	
14 – 07	-	11:00 d/r R. Giselbrecht	-	09:45 d/r R. Giselbrecht	
21 – 07	-	09:45 d/r R. Giselbrecht	11:00 d/r R. Giselbrecht	-	
28 – 07	-	11:00 d/r R. Giselbrecht	09:45 d/r R. Giselbrecht	-	
<b>avuost 2024</b>					
In avuost program da stà in mincha fracziun üna jada ün cult divin per tuots					
04 - 08	→	11:00 d/r R. Giselbrecht	←	←	Cult divin da Taisè per tuots a Zernez
11 - 08	→	→	11:00 d/r R. Giselbrecht	←	Cult divin per tuots a Susch
18 - 08	→	→	→	11:00 d/r R. Giselbrecht	Cult divin da famiglia per tuots a Gonda/Lavin
25 - 08	11:00 r Fadri Häfner	←	←	←	Cult divin per tuots a Brail
r: liturgia e predgia in rumantsch; r/d: liturgia in rumantsch, Predigt auf Deutsch d/r: Liturgie und Predigt auf Deutsch mit romanischen Elementen					

## Vacanzas da nossa ravarenda

Davo ses mais da lavor intensiva in nossa raspada, ha nossa ravarenda, *dr. Rebecca Giselbrecht*, merità da pudair far üna vouta vacanzas. Dals **30 da mai fin als 15 da gün** sarà ella dimena absainta. Il telefon da la pravenda gnarà svià d'ürant quel temp. Per dumondas da tuot gener stan a disposiziun il secretariat ed il president. La substituziun vain garantida dals ulteriurs ravarendas da las raspadas vaschinas in Engiadina Bassa e Val Müstair.



## Il program da stà in nossa raspada cumainza cun ün cult divin da Taizé, a Zernez

Sco adüna d'ürant il mais avuost, realisain nus in nossa raspada eir quist on darcheu il program da stà. Daspö divers ons han lö d'ürant las quatter dumengias d'avuost, mincha dumengia ün cult divin per tuot ils commembers da la raspada in ün'otra da nossas fracziuns. Scha pussibel sun quai lura eir amo cults divins ün pa specials. Pel solit es in avuost sco quist on eir il cult divin sü Gonda aint illa ruina da la baselgina dal cumün bandunà. Ed il cumanzamaint dal program da stà cumainza quist on, **als 4 avuost**, cun ün cult divin da Taizé per tuots illa baselgia San Basitian a Zernez. La cumünanza da la fraternità ecumena da Taizé d'eira gnüda fundada davo la seguonda guerra mundiala e s'ha culs ons sviluppada ad ün lö spiritual, ingio cha bleras gruppas da giuventüna cristiana da tuot las confessiuns s'inscuntran. Las chanzuns chi vegnan chantadas là, sun tradüttas in bleras linguas ed eir in rumantsch. I sun chanzuns cha duonna, ravarenda *dr. Rebecca Giselbrecht*, dovra gugent eir in otras occasiuns ed ella prepara gugent ün cult divin i'l sen da la cumünanza da fraternità ecumena da Taizé eir qua.



## Cult divin da famiglia a Gonda sco di d'inscunter

Eir quista stà es previs ün cult divin d'inscunter a Gonda cun la raspada dad Ardez-Ftan-Guarda. Previs es ün cult divin da famiglia cun musica e chant, pro'l qual i dess dar ün program special per uffants d'ürant il cult divin. Davo il cult divin lessan star da cumpagnia e giodair la cumünanza. Sco eir ils ultims ons sarà pront ün grigl per brassar minchün la charr ch'el piglia cun sai ed ün büfè da salata e deserts cha differenta glied maina cun sai. Il cult divin ha lö in dumengia, ils **18 d'avuost a las 11.00**, in cas da trid'ora vain il cult divin cul listess program spostà illa baselgia da Lavin. Per l'inscunter da cumpagnia tscherchessan a cuorta vista in mincha cas eir üna soluziun a Lavin.



## Giubilaras e giubilaras

In quist lö as chattessa nossa rubrica cun anniversaris da giubilaras e giubilaras cun anniversaris raduonds. Displaschaivelmaing stuvain renunzchar in avegnir our da plüs motivs sün quella rubrica. Nus vain adüna darcheu gnü disgusts pervia da sbagls pro anniversaris. Ed il böt d'eira natüralmaing quel da far plaschairs e na da chaschunar disgusts. Ultimamaing haja dat disgusts eir causa cha qualchün vaiva ils ons e nu figüraiva in nossa glista. Causa la mancanza, han lura oters savü cha quella persuna d'eira sortida da la baselgia. Oters giubilaras han annunzchà ouravant ch'els nu lessan lura figüra sün nossa glista. Davo ün sclerimaint cun la baselgia chantunala eschan gnüts infuormats cha tenor ledscha da protecziun da datas, stuvessan avant co publichar anniversaris dumandar a mincha singul per permiss. Uschè vaina stuvü decider da renunzchar sün quella rubrica e sperain sün incletta.

## Viadi per nos seniors



Sco adüna organisescha eir quista stà nossa raspada cun sustegn da la raspada catolica e dal cumün ün viadi per senioras e seniors da tuot nossa cumünanza. La data previssa pel viadi es, **als 13 avuost** e tant pudaina tradir cha'l viadi ans maina a **Poschiavo**. Intant es'important da reservar la data. Il program da viadi detaglià cun talun d'annunzcha gnarà lura tramiss sco minch'on a las personas ill'età correspondent da tuot nossas fracziuns. Natüralmaing speraina darcheu sün numerusa partecipaziun ed üna flotta cumpagnia da viadi.

Sülla fotografia as vezza l'intera brajada chi'd es statta da la partida l'on passà our il Signuradi.

## Pulir las baselgias a Zernez

Quista stà vessan gugent dad organisar darcheu üna vouta ün di per pulir las duos baselgias a Zernez. Voluntarias e voluntaris chi sun pronts da pulir la baselgia San Bastian e la Baselia gronda, piglian cun sai il material da pulir e vegnan **als 12 da gün a las 9.00** sü pro las baselgias. Suot la bachetta da noss culuosters Jack Pinggera e Nuot Filli e da nossa commembra dal consistori, Ottiglia Godly vegnan lura spartidas süllas personas voluntarias sün las duos baselgias - e pulischan quellas. Sco grazcha fich daja per tuot ils voluntarias e voluntaris üna buna marena. Il consistori es grà per mincha agüdant e mincha agüdanta.

## Voluntari(a)s per pulir las baselgias a Lavin e Susch

Ils temps cha eir a Lavin e Susch organisaivan ils culuosters dis per pulir las baselgias sun per mancanza da voluntaris, blers ons inavo. Ils culuosters han stuvü far quai d'ürant ils ultims ons adüna plü o main sulets. Oramai cha nus fain qua aint la punt ün appel per voluntaris chi pulischan las baselgias a Zernez, provain listess amo üna vouta da tscherchar almain singulas personas chi füssan prontas da güdar eir als culuosters da Lavin e da Susch. Ün termin per far la pulizia as po lura far giò cun quellas personas chi s'han annunzchadas. Voluntarias e voluntaris chi sun pronts da güdar a pulir la baselgia s'annunzchan dimena a Lavin pro la culuostra, Anna Margaritta Filli ed a Susch pro'l culuoster Hermann Thom.

## Contacts cun la raspada:

### Presidi:

Hermann Thom  
obain

079 413 02 03  
[hesti@bluewin.ch](mailto:hesti@bluewin.ch)

### Secretariat:

Flurina Walter  
obain

079 586 12 39  
[flurinawalter@hotmail.com](mailto:flurinawalter@hotmail.com)

## Per dumondas da chüra d'ormas e da quellas spiritualas

as po s'annunchar eir directamaing pro nossa ravarena dr. Rebecca Giselbrecht, ella es raggiundschibla suot [081 856 15 43](tel:0818561543) obain [rebecca.giselbrecht@gr-ref.ch](mailto:rebecca.giselbrecht@gr-ref.ch)

## Nossa homepage ha ün nouv aspet

Suot «<https://zernez-ref.ch>» as chatta fingià daspö blers ons la homepage da nossa raspada in rumantsch ed in tudais-ch. D'ürant l'on passà vaiva quella lura gnü ün sbagl plü grond e per ün temp nu d'eira plü pussibel da clomar sü quella. In quel mumaint vain güsta tut l'ocasiun per renovar e simplifichar cumplettamaing nossa pagina, da maniera cha quella dovra d'üna vart da main temp per tilla tegner adüna actuala ed es da l'otra vart vaira simpla per quels chi vöglian far adöver d'ella.